



Aqqalu C. Jerimiassen

UKA 2022/87

Atassut

09. november 2022

**Takornariaqarneq aallaavigalugu ilinniarfiusinnaasumik Ilulissani ilinniartoqarfimmik pilersitsinissamut aalajangiisoqarsinnaanissaanut tunngavissanik Naalakkersuisut misissuinissaat pillugu Inatsisartut aalajangiiffigisassaattut siunnersuut. Ilinniartoqarfik minnerpaamik serviceøkonom, Arktisk Turistguide aamma Adventure Guide ilinniakkatut pigissavai. Misissuineq kingusinnerpaamik UKA 2023-mi Inatsisartunut tunniunneqassaaq.**

(Inatsisartunut Ilaasortaq Nivi Olsen, Demokraatit)

Nammineerlunga takornarialerineramik sammiveqartumik Serviceøkonomitut ilinniangaqarpunga, tamannalu ilinniangaq 2007-imiik 2009-mut Qaqortumi ingerlannikuullugu.

Eqqumiiginalaarsinnaangunaralarpoq Iluliarmiullunga takornariaqarfiunerpaameersuullunga, taamaakkaluartoq nunatta kujataanut ilinniariartornera takornarialerineq pillugu. Taamaattorli Ilulissani praktikkernikka tamaasa ingerlallugit.

Ukiumininnguit iluini Ilulissani takornariaqarnikkut piffissaq takornariaqarfiulluartartoq annertuumik tasikkiartorpoq, soorluli sumiorpaluutigut maliinnarlugit.

Siornatigut takornariaqarnikkut ukiut ingerlanerani qaammatit pingasuinnaat ingerlalluarfiusarsimangaluarput. Maannali upernassariaqartoqqajalernerinnaani takonarissat allaat takussaallualersimaqaat, ukiassamuinnarlu killikkunnaarlutik ukjarluariivinnerani aatsaat appariartulertarlutik.

Oqartoqarniartaralarpoq isiginnaartuinnaasugunngooq takornarialerinerup iluani, tapiissutinillu tuniorarneqaannartoroq takornariaqarneq. Ila taanna imminut nalligerusunnarsuaq illikaallassinnaasuugaanni immaqa, taamatullu pissusiviusut takornarialerinerup iluani qimerloorlualarlugit naliliisinnassuseq allannusagunaraluaqaaq. Namminersortut takornarialerisuuneq misilittagaqarfingaara, atortullu pigisakka piginneqatigisimasaralu nammineq 1kr-imilluunniit taperneqarata aallartisarsimallugit, imminut upperineq nammineersinnaanerlu immaqa tapiutaasutut isaasalerlugit taasinnaavagut, imminut nalligiinnarsimasuugutta isiginnaartuinnartullu nalilersimasuugutta, tassaana aallartissimassagaluarpuq.

Avataaniit annertuumik suliarortoqartarnera annerpaamik ataasiinnapajaamik peqquteqarluarpoq, nunatsinnimi sulii ukioq naallugu takornariaqarneq ataavortoq inerisarnikuunngilarput, ukiorlu

kaajallallugu suliffiit soorunami toqqissisimanarnerusutut isigisartillugit tupinnartuunngilaq ukiumut ilaannakortumik suliffissamik pissarsinissap tunulliunneqartuarternera.

Takornarialerinerimik ilinniakkat ilaasa Ilulissanut nuunneqarnissaannik siunnersuuteqartoqarnera Atassummiit tupaallaatissaqartinngilluinnarparput pissusissamisoororiinnarlugulu.

Tassami sumiiffik takornariaqarnikkut nunatta sinneranut ukiunik qulinik minnerpaamik siuaqqasoq arlaatigut isiginiarneqartariaqarnera tupannanngilluinnarmat.

Tassaniippummi ukiuni taamannani takornarialerinerimik kiffartuussinermillu ulluinnarsiuteqarlutillusooq taamaattussaannartut isiginnilersimasut, annertungaatsiartumik ilinniartitsisusinnaalluurtut sinerissap sinnerani takornariaqarnikkut ineriartortoqaqqissappat.

Takornariaq nammineerluni tikinnaviannngilaq, aatsaalli ussassaarigutta tikissaq. Oqaannarsinnaannngilagut, maani unnuisarfiliorortoqannngilaq, manna inerisarneqannngilaq, sooruna neriniartarfeqannngitsugulluunniit, takornariaqalertariaqaralarpoq, sooruna pisortat taamaaliunngitsut, sooruna umiarsuit takornariartaatit tikikkaagata uagut sunneqarneq ajortugut?

Takornarialerisunngussagaanni taakku isummat eqqaavimmut sukkanerpaamik igiinnangassaapput, namminerminniimmat suliassaq tamarmi, allat aallartikkunnanngillat unilluta utaqqiinnaralarutta. Uninngaannaruttalu isiginnaartuinnartut imminut isigaluta allanngortoqarunnanngilattaq.

Takornariaqarnerup inerisarneqarnissaa eqqarsaatingalugu, ilinniangaqarsimaneq tassani sakkussaavoq pingaarnepaaq, nammineq takornariaqarnerup ineriartortinnissaanut suliniuteqaqataaneq.

Ukioq naallugu takornariaqarnerup ataavartumik ingerlalersinnaaneranut suliffissatigullu nunaqqatigiinnut piulissappat matuersaat annerpaaq tassaavoq ilinniangaqarnissaaq. Nunanit allaneersut ukiorpassuarni namminneq inerisaasimanermikkut killiffik taanna angunikuuat, namminneq takornariaqarnertik ukioq naallugu ingerlasinnaalersinnikuuat ukiorlu naallugu suliffinnik ataavartunik pilersitsivigilluarlugu, taava isiginnaartuinnaanermik inangersimaneqarnermillu misigisimaneq nammineq qaangiukkiartulissaaq, nallinnartutummi misigisimaniaannartariaqannngilagut, utaqqiinnaratalu, iliuuseqarutta aatsaat tamanna inissaminut piartulissooq, allanimmi pisuutitassaqaannngilagut, tamanna tamarmi nammineq assatsinniippoq.

Takornarialerinnikkut ilinniakkat nunatsinni maanna pingasuusut, ilaat Ilulissanut inissinneqarsinnaappat, imaluunniit takornarialerinerimut ilinniakkamik allamik Ilulissani pilersitsisoqassappat, ila ilinniartitsisuulluarsinnaaqisugut amingaataagunannngivikkaluaqaagut, uinnitsinniilli takornarissanik isigilernikuusugut.

Taamaattumik Atassummiit nuannaarutigeqaarput, Nivi Olsen, Demokraatit, siunnersuummik qaqitaqarmat. Tusaaneqarsinnaareerunnarsisutullu, annertungaatsiartumik isuma tapersornartipparput.

Taamaattorli misissueqqarnissarlunniit tassani pisariaqartuusoreqqaanngivikkaluarparpulluunniit, toqqaannaq naalakkersuisut kaammattorusunnaralarlutik sulimik ingerlatsilissasut.

Misissuisitseqqaarnissaq qularipajukkaluarlugu, siunnersuut Kultureqarnermut, Ilinniartitaanermut, ilisimatusarnermut ilageeqarnermullu ataatsimiitsitaliamut innersuupparput.